

**H**üttenmeister / Schmelzer / Furlauffer / Bestübmacher /  
Wachter / vnd alle andere Hüttenarbeiter / sollen mit vorwis-  
sen vnser Hauptmans / oder Verwalters vnd Hüttenreuter  
angenommen / inn das Ampt bracht / daselbst gebürliche pflicht  
thuen / Vns inn alle weg / vnd den Gewercken / souiel ihr Arbeit bes-  
trifft / getrew vnd gewertig zusein / Ihrer arbeit getreulich vnd vleiß-  
sig vorzustehn / sich an threm gemachten Lohn begnügen zulassen /  
vnd dise ordnung souiel sie die betriefft halten / weder den Hütten-  
herrn noch Gewercken / viel oder wenig wider die billigkeit / zu noch  
abwenden / sondern einem ieden was ihm gebürt zu nutz arbeiten.

Vnd die Hüttenmeister / sollen weder an dem Hüttenwerck dar-  
innen sie arbeiten / noch andern Eainen teyl haben / noch nutzses ge-  
warten / anders dann was ihr lohn belanget.

Die Hüttenmeister sollen auff alle Hüttenarbeiter vleißig ach-  
tung geben / damit ein ieder seine beuolhene arbeit / getreulich vnd  
mit vleiß ausrichte / insonderheit aber sollen sie auffmercken / das die  
Schmelzer die öfen mit vleiß zumachen / die herde vnd spar nach  
gelegenhait eines ieden Ertz arbeit / vleißig stossen vnd abwermen /  
die forme rechtschaffen legen / das gebleß gleich führen / den Gewer-  
cken treulich vnd mit vleiß zuarbeiten anhalten / vnd vnderweisen.

Es sollen auch alle Hüttenarbeiter / dem Hüttenmeister gefol-  
gig vnd gehorsam sein / Vnd ob etwan ein Schmelzer bessern bes-  
schaidt inn der arbeit wüßte / dann der Maister selbs / so sol er dem  
Maister zugefallen / der Gewercken nutz zuschaffen inn keinem weg  
vnderlassen / sondern das beste fürwenden.

Der Hüttenmeister vnd Schmelzer geitz abzuwenden / vnd  
damit arme geschickte Schmelzer / vnd arbeiter auch gefördert  
werden mügen / Sol hinfürder Eainem vnder ihnen / den Hütten-  
meistern vnd Schmelzern / mehr dann mit einem ofen zuarbeiten /  
auch nur einen / vnd nicht mehr gemitte iungen zuhaben gestattet  
sein / darauff die Hüttenreuter / vnd Hüttenreiber zusehen / Vnd  
wo sie das widerspiel finden / abzuschaffen vnd zustraffen haben  
sollen.

Es sollen auch Hüttenmeister vnd Schmelzer / an der Furla-  
uffer / vnd ander Hüttenarbeiter lohn / gantz keinen genieß oder  
vortail / wie zuerdencken haben / sondern einem iedern sein gebürend  
verdient lohn / wie ihme das / nach der schicht / oder ofen zustehet /  
vnd geschrieben ist / an vermindering volgen lassen.